

Dat wor dat letzte Johr vum Kreeg un dä Ühm wor gestorve. Un alles maht sich alsu jetz noh der Mess en der Kapell op der Wäg nohm Grav.

Dä Ühm hatt jet an de Föß gehad, alsu dat woren kein ärm Lück. Dä Sarg wor toll. Dä Sarg hatt su Föß wie vun enem Löw. Un dann woren se am Grav, vill Lück stundten eröm un dann fingen die Pooschten aan, dä Sarg ...

Ach nä, dat ging nit. Die Löweföß wore jet breid, alsu han se die avgemaht. Jetz stundt dä Sarg do un dann wollten se dä esu rungerlooße en dat Loch, ävver dat Loch wor zo klein, dä Sarg wor zo lang. Un jetz, mer stundt do röm, et Wedder muss god gewäs sin, mer wor am Schweißte.

Ming Mutter verzallt dann immer: "Jo, do leeßen se dä Ühm zoeets met de Föß eren. Ävver jetz stundt e schräg noh bowe. Dann han se 'n widder huhgetrocke. Dann leeße se en mem Kopp eren. Jetz stundt e schräg noh unge. Jetz stundt dä ärme Ühm om Kopp. Dann han se en widder huhgetrocke."

Alsu de Lück wore faszineet. Et wor e Spill! Un irgendwann en däm Ganz-Leis-Sin un Luure an däm Grab - die Pooschten, die troke - kom von hingen en Stemm, die: "Hoch, luur! Jetz trecken se 'n ald widder huh. Do kütt e ald widder huh!"

Un dann wor et aus! Alles wor am Laache, am Griemele, am Prusten. Dann han se endlich dä Sarg donevve gestallt, su dat mer dran vörbei defiliere kunnt. Ming Mutter hät immer gesaht: "Nä, weiß de, dat wor de schönste Beerdigung, die ich mer vürstelle kann. Ich hör die Stemm noch vun hingen, dat säht: 'Hoch, do kütt e ald widder huh'."

Rapp, Anne (67): *Erop un erav*

dat vo: dat lætstə jøɔ̯ fɔm kʰæ:ŋ ʔʊn dɛ ʔy:m vɔɔ̯ jæftʊvə ʔon ʔaləs ma:t zɪŋ ʔalzo jɛts̥ nɔ: dɔɔ̯ mɛz̥ en dɛ ka'pɛl ʔop tɛ:n vɛ:ŋ tʃʊm gʷa:p dɛ ʔy:m hat jɛt ʔan dɛ fɔ:s jəhat ʔalzo dat vo:ən ken ʔɛm lɪk dɛ zʌvəŋ vo tɔl dɛ zʌvŋ hat zo fɔ:s vi fʊn:əm lɔ:f ʔʊn dan vo:vən zə ʔam gʷa:p fɪl:ɪk stʊnt̚_əvəm ja ʔʊn dan fɪŋən di po:ft̚ ʔa:n dɛ zʌvŋ ʔax nɛ: dat jɪŋ nɪt di 'lɔ:vəfɔ:s vo:vən jɛt bʰɛɪt ʔazo han zə di: 'ʔafjɛma:t jɛts̥ stʊnt̚:ɛ zʌvŋ dɔ: ʔon dan vʊlt̚ zə dɛ:n_əzu vʊŋɛ lɔ:sə ʔɛn dat lɔx ʔɛvɛ dat lɔx vo tʃo klɛɪn dɛ zʌvŋ vo: tʃo lɑŋ ʔʊn jɛts̥ mɛ stʊnt̚:ɔ vəm_ət vɛdɛ mʊs jo:t jɔvɛ:s:ɪn mɛ vɔɔ̯ ʔam sʷɛɪstɛn ʔʊn mɪŋ mʊtɛ fɛts̥alt:an ʔɪmɛ jɔ dɔ lɛ:sən zə dɛ ʔy:m tʃo'ʔɛ:ts̥ mɛt:ə fɔ:z_əvɪn ʔɛvɛ jɛts̥ stʊnt̚_ə sʷɛ:ŋ nɔ bovə dan han zən vɪdɛ 'hu:jətʌkə dan lɛ:sən zən mɛm kɔb_əvən jɛts̥ stʊnt̚_ə sʷɛ:ŋ nɔ ʔʊŋə jɛts̥ stʊnt̚:ɛ ʔɛvmɛ ʔy:m ʔom kɔp nɛ da han zən vɪdɛ hu:jətʌkə ʔalzʊ dɛ lɪk fɔ:və fastʃɛ'nɛ't ʔət vɔɔ̯_ə sʷɪl ʔʊn 'ɛxjɛntvɑn ʔɪn dem jɑnts̥ lɛɪs:ɪn ʔʊn lu:və ʔan dem gʷa:p ti po:ft̚ di tʌ:kə kɔ:m vɔn hɪŋə nɛ stɛm dɛ hɔx lu:ɔ̯ jɛts̥ tʌkən zən_alt vɪdɛ hu: tɔ kɪt_ə ʔalt vɪdɛ hu: ʔʊn dan vɔɔ̯t ʔʌv̥s ʔaləs fɔ: ʔam la:xtə ʔam gʷɪ:mɛlə ʔam pʷu:st̚n dan han zə 'ʔɛntlɪŋ dɛ zʌvŋ dɔ'nevən jɛstɛlt so dat mɛ dʌn fɔ'bʌɪ dɛfɪlɪɔ̯və kʊnt̚ mɪŋ mʊtɛ hɛd_ɪmɛ:əza:t nɛ vɛs_tɛ:t vɔ:ɔ̯ dɛ sʊ:nstɛ bɛ'ʔɛɔ̯ɪjɔŋ di:ç mɛ 'fɔɔ̯stɛlə ka ʔɪŋ:y:ɔ̯ dat stɛm nɔx fɔn hɪŋə dat sɛt hɔx da kɪt_ə ʔalt vɪdɛ hu:

